



En l'entir Grischun vegnan repartidas chapitschas cotschnas a las scolarnas ed als scolars da l'emprima classa per il cumenzament da la scola 2008.

POCHA

Chapitschas cotschnas per il cumenzament da la scola

■ (pocha) Ils 18 d'avust 2008 cumenza il nov onn da scola en la gronda part da las vischnancas grischunas. Tschients da scolarnas e da scolars cumenzan la scola quest atun. La polizia chantunala dal Grischun e la polizia da la citad da Cuir sco er la cassa da malsains publica (CMP) lantschan er quest onn in'acziun communabla per il cumenzament da la scola: En l'entir Grischun vegnan repartidas chapitschas cotschnas a las scolarnas ed als scolars da l'emprima classa. Questas chapitschas cun pala dattan en egl en il traffic sin via e daventan in'attracziun per las automobilistas e per ils automobilists.

Centrala è la segirezza da las participantas e dals participants da traffic ils pli giuven. Il mintgadi da scola vegn a chaschunar intginas midadas per ils uffants. Tranter auter vegn barattada l'enconuschenta via da scolina cun ina nova via da scola. Sch'i ston vegnir traversadas vias sin quella, è quai in grond privel per las pitschnas e per ils pitschens. La polizia s'engascha ensemen cun la CMP per minimalisar quests privels ed

ella sa stenta da garantir ina via da scola segira.

Quest engaschament serva a la segirezza dals uffants sin lur via da scola. Cun exercitar situaziuns difficilas en il traffic sin via vegnan promovidas l'indipendenza e la confidenza en sasez dals uffants. Quest trenament en il traffic facilitescha als geniturs da laschar ir lur uffants a pe a scola. L'acziun vegn sustegnida cun placats «Cumenzament da scola! Attenziun uffants!» e cun flyers.

Las collavuraturas ed ils collavuratur da las basas da la polizia da traffic, dals posts da polizia e da l'instrucziun da traffic vegnan a survegliar las vias da scola durant las emprimas emnas. Gia la segunda emna da scola cumenza l'instrucziun da traffic en las scolinas.

La polizia chantunala fa attents tut las participantas e tut ils participants da traffic a lur funcziun d'exempl. Ils uffants emprendan il meglier cun imitar. Tuts duessan esser conscients da quest fatg e contribuir – cun lur agen cumportament – ad ina buna instrucziun da traffic. Prendai resguard dals uffants en il traffic

sin via e manischai Voss vehichel cun gronda precauziun sin las vias da scola.

Tips per ina via da scola segira

Accompagnai Voss uffant pliras giadas sin la via da scola u tar il bus da scola. Na tscherni betg la via la pli curta, mabain la via la pli segira.

Sche Vus giais a prender Voss uffant, spetgai directamain a la sortida da la scola e betg da l'autra vart da la via.

Voss uffant duai spetgar tar la strivla melna, fin ch'ils autos èn sa fermads dal tuttafatg.

Tramettai Voss uffant a temp a scola. Currim e prescha augmentan la ristga d'accidents.

Laschai ir a scola cun velo Voss uffant pir cur che Vus essas segirs ch'el vegn a frida cun il traffic e pir cur che la scola e che Vus chattais quai per bun.

Insisti che Voss uffant portia ina chapellina e la purtai er sez.

Faschai stim che Voss uffant sa fermia, avant che metter pe sin la via. La devisa «spetgar, guardar, tadlar, chaminar» vala anc adina.